

PASSION (PANAONON)

PARTANGIANGAN PASSION
MARNINGOT PANAONON NI TUHAN JESUS
BORNGIN II



HKBP JATINEGARA
Selasa, 15 April 2025

1. Tangiang na hohom / Saat teduh - Melodi

2. Marende: BE 858: 1 - 2 “Jesus Kristus”

☞ *Jesus Kristus sondangi rohangku*
Unang na holom mangarajai au
Jesus Kristus sondangi rohangku
HolongMi manggohi rohangkon
Jongjong

☞ *Jesus Kristus sondangi rohangku*
Unang na holom mangarajai au
Jesus Kristus sondangi rohangku
Sai tondiM ma manggomgomi au

3. Votum-Intro-Tangiang:

P : Marhitehite goar ni Debata Ama dohot goar ni AnakNa
Tuhan Jesus Kristus, dohot goar ni Tondi Parbadia.

H : Amen.

U : Songon pangkaholongiNa di angka na di Ibana na di portibi on, laos songon i do dihaolongi nasida ro di ujungna. Haleluya, **Martangiang ma hita** : Ale Tuhan Debata, Amanami na di banuaginjang, Parasiroha na sumurung! Na mandok mauliate ma hami tu Ho sian nasa rohanami ala dilehon Ho AnakMu na sasada i tu hamatean humophop hami, asa unang mago na porsea di Ibana, alai asa hangoluan na saleleng ni lelengna di nasida. Tatap ma hami, ale Amanami di bagasan AnakMu Jesus Kristus, na gabe habadiaon dohot hatigoran di hami. Sai sesa ma dosanami saluhut, ala ni pelean na sun denggan, na pinelehonNa i humophop hami. Sai paeleng ma pinggolMu tu tangiang nami, jala asi ma rohaM di hami marhitehite AnakMu, Tuhan Jesus Kristus Tuhannami. Amen.

4. Marende: BE 722: 1 “Tu JoloMi Tuhanku

*Tu joloMi Tuhanku huboan diringkon
Palua ma tondingku sian saluhut dosangkon
Jesus Ho do Tuhanku, Jesus Ho do Rajangku
Tu tanganMu ma O Tuhan, Hupasahat daging tondingkon*

5. Tatangihon ma udut ni partinaonan ni Tuhan Jesus andorang so sahat tu hau pinarsilang i. Tong do nian ujung ni Anak ni Jolma i songon na tarsurat hian; alai marlea do halak na pasahathon Anak ni Jolma i. Tagonan unang ma sanga tubu ibana tu hasiangan on. Alai adong ma sada sian angka siseanNa i, na hundul jumonok tu Ibana, haholongan ni Jesus i, i ma dihilap si Petrus, jadi ninna ma mandok ibana: sungkun ma, ise na nidokNa i. Jadi dipajonok ma tu lambung ni Jesus mandok tu Ibana: Tuhan, ise i? Gabe dialusi Jesus ma: Ia tusi Hulehon na santopik na husornophon on, i ma ibana. Jadi disornophon ma santopik, dilehon ma tu si Judas Iskariot, anak ni si Simon. Jadi dung dibondut i, dibongoti sibolis i ma ibana. Dung i didok Jesus ma tu ibana: Humatop ma ula siulaonmu. Asa dung dijalo si Judas na santopik i, pintor laho do ibana tu balian, alai borngin ma uju i. Jadi di na mangan i nasida, dihindat Jesus ma roti, dipasupasu ma, diponggoli ma jala diparlehon ma tu angka siseanNa, huhut ma didok: Jalo hamu, pangan hamu, dagingKu do on. Dung i dihindat ma panginuman i, didok ma mauiliate, dilehon ma tu nasida, huhut ma didok: Sude hamu manginum sian i. Ai mudarHu do on, mudar parpadanan i, na niusehon humophop torop, bahen hasesaan ni dosa. Alai hudok ma tu hamu: Na so tupa

be inumonKu olat ni on sian parbue ni hau anggur i sahat ro di ari sogot; disi ma inumonKu na imbaru rap dohot hamu di Harajaon ni Damang.

6. Koor : Ina Cipinang Jaya Prumpung

7. Marende: BE 179: 1 - 2 “Adong Do Sada Mual”

- ☞ *Adong do sada mual i, di na mardosa i*
Mansai denggan do mual i pasonang rohangki
- ☞ *Aek mual na badia i, i ma di Jesus i*
Disesa do tihasta i, dibuat arsak i

- 8.** Jadi dung diendehon nasida ende pujipujian i, ruar ma nasida tu dolok Jetun. Disi ma didok Jesus tu nasida: Saluhut do hamu naeng targasip mida Ahu di na saborngin on. Ai na tarsurat do: Lombutanku ma parmahan i, gabe marserak ma birubiru na sapunguan i. Alai ninna si Petrus ma mangalusi Ibana: Agia sude nasida targasip mida Ho, anggo ahu, na so tupa targasip. Alai ninna Jesus ma mandok ibana: O Simon, Simon, nunga dipangido sibolis naeng segeonna hamu songon dahanon. Alai Ahu do manangianghon ho, unang mintop haporseaonmi. Jadi dung mulak sogot roham, pargogoi ma roha ni angka haha-ang gim! Alai ninna si Petrus ma mandok Ibana: Tuhan, na hobas do ahu mandongani Ho tu hurungan, nang tu hamatean pe! Alai ninna Jesus ma: Hudok ma tu ho Petrus: Nandang martatahuak manuk saborngin on, so jolo tolu hali soadahononmu na so tinandam Ahu.

9. KOOR : PSW Gita Aulia

10. Marende: BE 83: 1 “Na Lao Do Birubiru I”

- *Na lao do Birubiru i, Mamorsan angka dosa
Ni nasa hajolmaon i, Di benget ni rohaNa
Diporsan do sahitta i, Dilehon do DiriNa i
Tu tangan ni pamunu, Ditaoni do na bernit i
Rodi na tos hosaNa i, Didok : Naeng porsanonHu*

11. Dung i sahat ma Jesus rap dohot nasida tu sada porlak, na margoar Getsemane. Jadi didok ma tu angka siseanNa i: Hundul ma hamu jolo dison saleleng disan Ahu martangiang. Dung i ditogihon ma si Petrus dohot anak ni si Sebedeus na dua i, dung i gabe marsak situtu ma Ibana jala bobonosan. Jadi didok ma tu nasida: Mansai marsak situtu do rohangKu, hira na mate do. Dison ma hamu dungo rap dohot Ahu. 9 Dung i laho ma Ibana saotik tu jolo, dipatungkap ma bohiNa tu tano martangiang, ninna ma: Ale Amang, namun na tarbahen, salpuhon ma siinumon on sian Ahu! Alai tahe, unang marguru tu rohangKu, rohaM do. Dung i mulak ma Ibana tu angka siseanNa, jala tarpodom nasida didapot, jadi didok Jesus: Ndang margogo hamu hape dungo rap dohot Ahu nanggo sangombas! Dungo ma hamu jala martangiang, asa unang hamu bongot tu pangunjunan, ai na girgir do nian tondi i, alai gale do ia daging.

12. Koor: EFESUS

13. Marende: BE 408:1 “Bornginnai”

- *Bornginna i, di porlak i, tarbege angguk bolon
Hinorhon ni dokdok na i, sai on nama dijouhon
Ale Amang bereng au on, Ai ingkon taononku ?*

- 14.** Dung i laho ma Ibana paduahalihon martangiang, ninna ma: Ale Amang, molo so tarbahen salpu on, nda ingkon Huinum, sai saut ma lomo ni rohaM!. Dung i di na ro Ibana, tarpodom muse ma siseanNa i didapot, ai mansai dokdok do salibon nasida. Jadi ditadingkon ma laho martangiang patoluhalihon mandok hata ondeng. Dung i didapothon ma muse angka siseanNa i. Jadi didok ma tu nasida: Datdatan muna dope modom dohot maradian? Nunga dapot tingkina nuaeng, sahat ma Anak ni Jolma i tu tangan ni pardosa. Hehe ma hamu, laho ma hita! Ndi, nunga ro na pasahathon Ahu. Alai diboto si Judas parjehe i do inganan i, ai jotjot do marpungu Jesus tu si dohot angka siseanNa. Ia si Judas, diarahon ma angka soldadu dohot angka naposo ni Sintua ni malim, didapothon ma tusi mantat sulusulu, palito dohot sinjata. Diboto Jesus do saluhut na naeng songgop tu Ibana, jala ruar ma Ibana, didok ma tu nasida: Ise do na jinalahanmu? Gabe ninna nasida ma mangalusi Ibana: Jesus halak Nasaret i do! Dung i ninna Jesus ma mandok nasida: Ahu do i! Alai dohot do si Judas siparjehe i jongjong di lambung nasida. Asa dung didok tu nasida: Ahu do i, sumurut ma nasida, angka martinggangan ma tu tano. Dung i diulahi ma manungkun nasida: Ise do na niluluan muna? Jadi didok nasida ma: Jesus halak Nasaret i do! Dung i ninna Jesus ma mangalusi nasida: Nunga Hupaboa tu hamu, Ahu do i. Asa molo Ahu dilului hamu, loas ma laho angka on! Ai naeng jumpang na nidokNa i: Nandang adong na mago Hubahen agia sada sian angka na nilehonMi tu Ahu. Alai nunga

dipabotohon parjehe i hian partinandaan tu nasida ai didok do: "Ia i na huumma, Ibana ma i. I ma tangkup hamu!" Asa pintor didapothon ma Jesus, didok ma: "Tabi di Ho Guru! laos diumma". Alai ninna Jesus ma mandok ibana: Marhua ho tuson, Anggia? O Judas pangummaon do hape dibahen ho pasahathon Anak ni jolma i. Dung i ro ma nasida, dilaluhon ma tangan nasida tu Jesus manangkup Ibana.

15. Koor : GMC

16. Marende: BE 180: 1 - 2 “Ro Tu Jesus Ho Na Loja”

- *Ro tu Jesus ho na loja Na maheu i
Lam lumbang do di lambungNa Rohami*
- *Bereng di hau pinarsilang Daon ni sahitmi
Tuhanmi na hona uhum Singkatmi*

17. Dung i adong ma sada sian angka dongan ni Jesus mangalaluhon tanganna, disintak ma podangna, ditampulhon ma tu sahalak naposo ni Sintua ni malim i, dipisikhon ma pinggolna. Jadi didok Jesus ma tu Ibana: Pasarung podangmi, ai na manintak podang, mago ma bahenon ni podang! Ai na so tarbahen Ahu do di roham mangido sian Damang, asa dipadiri di Ahu saonari lobi sian sampulu dua loksa surusuruan ? Alai songon dia ma disi saut hata ni surat i na mandok: Ingkon masa do na songon i! uju i ma didok Jesus tu angka natorop i: Hira na dompak panamun do hamu hehe, marpodang jala marlombut-lombut manangkup Ahu. Ariari do Ahu nian hundul mangajari di Bagasjoro, so adong ditangkup hamu Ahu. Alai na masa do sudena on, asa jumpang hata ni angka Panurirang i. Dung i

ditadinghon saluhut sisean i ma Ibana laho marporus. Dung i ditangkup angka soldadu dohot indukna sida ro di angka naposo ni Jahudi ma Jesus jala diihoti, jala ditogihon ma Ibana jumolo tu si Hannas, i ma simatua ni si Kayapas, Sintua ni malim di na sataon i. I ma si Kayapas naung mandok tu angka Jahudi: "Denggan do mate sahalak humophop bangso". Alai diihuthon si Simon Petrus dohot sisean na sada nari ma Jesus. Na masitandaan do sisean na sada i dohot Sintua ni malim i, jadi bongot ma Ibana rap dohot Jesus tu alaman ni malim i.

18. Koor: JUDIKA

19. Marende: BE 775:1 “Unang Holsoan”

☞ *Unang holsoan unang tahutan di Debatanta
Soada na hurang unang holsoan
unang mabiar, haposi Debata*

20. Jamita:

21. Marende: BE 718: 1 - 3 “Hubege Jesus Manjou”

(Papungu Pelean)

☞ *Hubege Jesus manjou, Hubege Jesus manjou
Sipalua au manjou, Porsan silang ihuthon ma Au
Sai ihuthononku Jesus, Sai ihuthononku Jesus
Sai ihuthononku Jesus, Huihuthon Jesus Tuhanki*

☞ *Tu Getsemane au dohot, Tu Getsemane au dohot
Rap marungkil dohot Jesus, Mangihuthon Jesus
Tuhanki
Sai ihuthononku Jesus. Sai ihuthononku Jesus
Sai ihuthononku Jesus, Huihuthon Jesus Tuhanki*

☞ *Aloonku ma diringku, Aloonku ma diringku
Porsanonku ma silangku, Mangihuthon Jesus
Tuhanki
Sai ihuthononku Jesus, Sai ihuthononku Jesus
Sai ihuthononku Jesus, Huihuthon Jesus Tuhanki*

22. Panutup: Tangiang & Pasupasu